

乾隆浙江通志考異殘藁

乾隆浙江通志

考異殘稿

海甯王氏校印

乾隆浙江通志考異殘稿

卷一

王忠愍公
遺書外編

海甯 王 國維

建置

建置表

杭州府孫策置吳郡都尉

案吳志朱治傳太傅馬日磾在壽春辟治爲掾遷吳郡都尉時在孫策平江東之前是後漢本有吳郡都尉非孫策始置矣

富陽縣晉咸安初改曰富陽縣

按宋書州郡志富春孝武改曰富陽則當在寧康以後非咸安初

浙江省

資治通鑑秦始皇帝二十四年王翦蒙武定楚以其地置楚郡案史記楚世家秦滅楚名爲楚郡蓋指楚都壽春一帶之地即九江郡之初名與浙江無涉胡三省注以爲後分爲九江

會稽鄣三郡者非也

資治通鑑王翦悉定荆江南地降百越之君置會稽郡

案史記秦始皇本紀始皇二十五年王翦遂定荆江南地降越郡置會稽郡通鑑本此又東越列傳閩越王無諸及越東海王搖者其先皆越王句踐之後也秦已并天下皆廢爲君長以其地爲閩中郡此事無歲月可考恐即在降越君之時然則閩中一郡殆與會稽同置矣

史記貨殖傳注秦置鄣郡

案貨殖傳集解江南者丹陽也秦置爲鄣郡漢書地理志丹陽郡故鄣郡武帝元封二年更名不云秦置然史記高祖本紀云六年以故東陽郡鄣郡吳郡五十三城立劉賈爲荊王

漢書高
帝紀同

是漢初已有鄣郡故裴駟於秦始皇本紀及貨殖傳集

解皆以爲秦郡晉書地理志從之雖無確證然高祖本紀云

項羽王梁楚地九郡非兼數鄣郡則不足九郡之數見下條故鄣

郡之爲秦置與否雖不可知然楚漢之際已確有此郡矣

資治通鑑六年以淮東五十三城立從兄賈爲荊王十二年立

兄子濞爲吳王更以荆爲吳國

案史記高祖本紀六年故東陽郡鄣郡吳郡五十三城立劉賈爲荆王又吳王濞傳十二年以荆故地三郡五十三城立沛侯濞爲吳王通鑑本此吳郡卽會稽郡時會稽治吳故亦稱吳郡此浙江於漢初爲荆吳地之明證也

浙江之地自秦亡之後至劉賈受封之前果屬何國自唐宋以來地志均未言及愚謂楚漢之際當屬西楚項氏亡後則屬韓信何以證之史記高祖紀項羽自立爲西楚霸王王梁楚地九郡九郡之目史無明文異說滋多迄無定論然漢滅項氏分其地以王彭越韓信彭越王梁韓信王楚信越所得郡數史亦無文然漢書高祖紀六年廢楚王信以東陽郡

臨淮郡廣陵國之地

鄣郡

吳郡

立劉賈爲荆王

以碭郡

薛郡

郯郡

三十六縣

立弟文信侯交爲楚王

皆因韓信

漢書楚元王傳作王薛郡東海彭城三十六縣彭城卽碭郡東海卽郯郡其薛郡則後之魯郡也

故地是楚地六郡也

十一年誅梁王彭越始立子恢爲梁王

子友爲淮陽王梁兼有故定陶泗水二郡淮陽故陳郡皆彭

越故地是梁地三郡也項羽所王梁楚地九郡卽此故會稽

越故地是梁地三郡也項羽所王梁楚地九郡卽此故會稽

鄣郡楚漢間當屬西楚韓信王楚因之前志未言附識於此
資治通鑑孝惠帝三年立閩君搖爲東海王都東甌

案此出史記東越列傳

史記吳王濞傳景帝三年削吳會稽郡徙汝南王非王吳故地
爲江都王

案漢書地理志會稽郡景帝四年屬江都丹陽郡故鄣郡屬
江都蓋據史記吳王濞傳江都王王吳故地爲言然考景帝
以後所封國皆食一郡江都無緣獨得吳故地三郡史記所
云王吳故地者只謂江都王都廣陵卽吳故都非謂盡得吳
故地也故朱育對濮陽興言景帝四年吳濞反誅會稽乃復
爲郡又武帝初年江都建國如故亦未有削地之事而據史
記東越傳時會稽已爲漢郡漢志所云爲不審矣劉敞漢書
刊誤以爲江都並得鄣郡而不得會稽亦非

資治通鑑元封五年置十三部皆置刺史

案漢書武帝紀元封五年初置刺史部十三州北通鑑所本
又小注引嘉靖浙江通志會稽丹陽皆屬揚州刺史部案漢

書地理志會稽郡丹陽郡屬揚州此嘉靖通志所本

嘉靖浙江通志始元二年以閩越地置回浦治二縣屬會稽郡
案置二縣之年漢書地理志不紀此以爲始元二年未知所
本

漢書地理志注錢唐西部都尉治回浦南部都尉治

案此乃班固自注非顏師古注注字當刪

又案吳志虞翻傳注引會稽典錄朱育對濮陽興語云元鼎
五年除東越因以其地爲治乃治字訛并屬會稽而立東部都尉

後徙章安陽朔元年又行治鄞或有寇害復徙句章此與漢

志所紀其官名有東部南部之異其治所有治章安鄞句章

之殊考章安卽回浦續漢志無回浦有章安劉昭注引太康

地記云章安本鄞縣南之回浦鄉蓋光武初年省縣爲鄉後

復立縣因更其名也東部南部二都尉不應同治一地漢志

又別無東部都尉是二都尉同實異名惟漢志言回浦南部

都尉治爲平帝元始二年事班氏修地理志用元始二年版籍而朱育言陽朔元年

已徙治鄞二說不同疑朱育之對於事實無誤而於年代則

未必盡合嘗熟考之知都尉之治治與回浦乃前漢事其徙
鄴與句章則後漢事也據漢志所記知都尉終前漢之世未
嘗徙鄴惟後漢書順帝紀載陽嘉元年二月海賊曾旌等寇
會稽殺句章鄴鄧三縣長攻會稽東部都尉疑都尉徙鄴實
在是年朱育所云陽朔元年者乃陽嘉元年之訛也回浦更
名章安時尙爲都尉治所故朱育云後徙章安從其後名也
其徙句章則更在其後如此則班固朱育二說均可得而通
矣

又案朱育言武帝立會稽東部都尉而班志但有南部都尉
唯後漢時始有東部之稱金石錄有永平八年所造會稽東
部都尉路君闕銘後漢書順帝紀亦云海賊曾旌攻會稽東
部都尉是後漢始稱會稽東部都尉朱育始以後漢之名加
之前漢也至三國吳時乃兼見東部南部二都尉如全柔張
紘芮良見吳志潘濬傳注爲會稽東部都尉而韓晏賀齊爲南部都尉而
張紘爲東部賀齊爲南部又爲同時事疑南部都尉卽置於
孫策進兵東冶之時賀齊傳言齊進兵建安立都尉府以後

遂爲常治孫休傳永安三年以會稽南部爲建安郡是也又孫亮傳太平二年以會稽東部爲臨海郡是吳時東部又治章安然則此官在前漢末稱南部後漢稱東部吳又兼置東南二部也

後漢書郡國志丹陽郡秣陵牛渚

按志云秣陵南有牛渚牛渚非縣此誤

又會稽郡東部候國

按東部候國乃東部候官之訛惠氏棟後漢書補注錢氏大昕二十二史考異並已正之此卽前漢志之治縣也漢初名東冶見史記東越傳漢書嚴助傳作冶而後漢書鄭弘傳魏志王朗傳吳志孫策賀齊呂岱傳亦作東冶蔣欽傳作冶漢書嚴助傳注引蘇林曰冶山名也今名東冶屬會稽按蘇林漢魏間人而曰今名東冶是後漢暨三國亦尙呼其故名太康地理志云東冶後改爲東候官後漢書鄭弘傳注引宋書州郡志云候官漢曰東候官攷吳志孫亮全夫人及賀齊傳亦稱候官惟虞翻傳作東部候官與續漢志合蓋東冶與冶者其故名東候

官若東部候官者其新名而候官又新名之略也愚謂因此一名得確知治縣爲前漢會稽東部都尉治所何則候官者都尉之屬也漢書地理志敦煌郡敦煌下云中部都尉治步廣候官此中部都尉下之候官也續漢書郡國志張掖屬國下亦有候官此張掖屬國都尉下之候官也

又據近日敦煌塞上所出漢木簡知敦煌中部都尉下有步廣平望二候官玉門都尉下有玉門大煎都二候官其候官或與都尉同治或分治都尉下之有候官猶校尉下之有軍候續漢書百官志部校尉一人比二千石部下曲曲有軍候一人比六百石都尉秩視校尉則其下之候官當與校尉下之軍候相當揚雄所謂東南一尉西北一候尉謂都尉候則候官也此候官之名義也蓋武帝初置會稽東部都尉本治治縣後徙回浦尙留一候官於此以其地爲候官所治故後漢時謂之東部候官或但謂之候官因爲縣名而東治之名轉廢晉書地理志乃謂後漢改東治爲候官都尉通典仍之四字連言不詞甚矣後漢會稽十四城中惟此縣今爲

福建地餘卽今浙江地也

三國吳志建安十三年權以六縣爲新都郡

注太平寰宇記云吳大帝分歙爲始新新定黎陽休陽四縣與黟歙凡六

縣因立
新都郡

案吳志孫權傳建安十三年使賀齊討黟歙分歙爲始新新定黎陽休陽縣以六縣爲新都郡又賀齊傳齊討丹陽黟歙表以葉鄉爲始新縣復表分歙爲新定黎陽休陽并黟歙凡六縣權遂割爲新都郡齊爲太守立府於始新舊志所引未詳復引太平寰宇記以注之蓋爲贅旒此中始新新定二縣在今浙江界

三國吳志黃武五年分丹陽吳會三郡十縣置東安郡七年罷東安郡

案吳志孫權傳黃武五年分三郡惡地十縣置爲東安郡

注引吳錄

曰郡治
富春也

以全琮爲太守平討山越七年罷東安郡又全琮傳丹

陽吳會山民復爲寇賊攻沒屬縣權分三郡險地爲東安郡琮領太守舊志所引未詳又案越絕書秦始皇帝東遊之會稽道度牛渚奏東安東安今富春丹陽溧陽樟故

殆故郡
訛

餘杭

軻亭考越絕書作於光武末年而已指富春諸縣爲東安則孫氏置郡亦用古地名耳十縣無考除越絕所舉五縣外疑尚有丹陽之於潛安吉原鄉吳郡之臨水但不知更得會稽何縣耳

三國吳志分吳丹陽爲吳興郡

注吳郡陽羨永安餘杭臨水及丹陽故鄣安吉原鄉於潛諸縣地勢水流之便悉注烏程分此九縣爲吳興郡治烏程

按孫皓傳寶鼎元年分吳丹陽爲吳興郡注引皓詔曰云云注字下當增皓詔曰三字

資治通鑑永嘉四年琅邪王睿以周玘爲吳興太守於其鄉里置義興郡以旌之

案晉書地理志以周玘創義討石冰割吳興之陽羨并長城

縣之北鄉

周玘傳作西鄉

置義興郡國山臨津并陽羨四縣又分丹陽之

永世置平陵及永世凡六縣立義興郡以表玘之功通鑑本此

晉書地理志太甯元年分臨海立永嘉郡

按晉志郡下當增統永甯安固松陽橫陽等四縣十二字

晉書地理志臨海郡統縣章安臨海始豐甯海永嘉郡統縣永

甯永固松陽橫陽義興郡統縣陽羨義鄉國山臨津平陵永世
按晉志作臨海郡統縣章安臨海始豐永甯甯海松陽安固
橫陽而無永嘉義興二郡其永嘉義興二郡之置與其所統
各縣僅見於後序中蓋晉志所載郡縣皆以武帝時爲準也
宜將晉志郡縣原文列前而將分置義興永嘉二郡事列後
則合於事實亦無增刪原書之病矣

資治通鑑元嘉三十年分浙東五郡爲會州省揚州立司隸校尉

案此條本宋書元凶劭傳

宋書孝武帝紀大明三年以揚州所統六郡爲王畿以東揚州隸揚州

案宋書州郡志大明三年罷揚州以其地爲王畿而東揚州直云揚州則本紀隸字當作爲

資治通鑑太清三年置吳州於吳郡

案梁書太宗紀太清三年秋七月以吳郡置吳州通鑑本此
資治通鑑注東陽郡梁置婺州

案隋唐二書地理志元和郡縣志太平寰宇記皆無梁置婺州事胡注疑未確

資治通鑑紹泰元年王僧辨以吳興爲震州

案梁書杜龕傳齊納貞陽侯以紹梁嗣以龕爲震州刺史吳興太守通典吳興郡梁末改爲震州此通鑑所本

太平寰宇記永定三年改信安縣爲信安郡

案隋書地理志不出信安郡

隋書地理志平陳改吳州曰蘇州東揚州曰吳州置總管府錢唐郡廢置杭州永嘉郡開皇九年置處州廢信義吳興臨海郡廢陳留郡省大德故鄆安吉原鄉入綏安縣金華郡廢置婺州按此條所引未備據隋志則平陳後所改之州名則吳州曰蘇州東揚州曰吳州所置之州則曰杭州曰歙州曰婺州曰處州所廢之郡則曰陳留郡曰信義郡曰信義郡曰吳興郡曰會稽郡曰錢唐郡曰金華郡曰永嘉郡曰臨海郡曰新安郡

隋書地理志仁壽三年置睦州杭州置總管府置湖州

案隋志仁壽中置湖州大業初州廢又云仁壽中置杭州總管府皆不云仁壽三年

唐書地理志武德四年改吳郡置蘇州改餘杭郡置杭州於烏程縣置湖州改遂安郡置睦州改會稽郡置越州改東陽郡置婺州於信安縣置衢州於臨海縣置海州改永嘉郡置括州於武康縣置武州於綏安縣置綏州又名雉州析故句章縣置鄞州以桐廬分水建德置嚴州於烏傷縣置縉州於剡置嵊州於餘姚置姚州於永康置麗州於龍邱置縠州於松陽置松州

按此條乃隱括新舊兩唐書地理志爲之有見舊書而不見新書者有出新書而不見舊書者今分釐之如左

舊唐書地理志武德四年改吳郡置蘇州改餘杭郡置杭州於烏程縣置湖州改遂安郡置睦州改會稽郡置越州改東陽郡置婺州於信安縣置衢州於臨海縣置海州改永嘉郡置括州於武康縣置武州於長城縣置雉州於故鄣縣置鄞州以桐廬分水建德置嚴州於烏傷縣置縉州於剡置嵊州於餘姚置姚州於永康置麗州於龍邱置縠州

新唐書地理志湖州長城下沈法興置長州武德四年更置綏州又更名雉州明州鄞縣下武德四年析故句章縣置鄞

州又處州松陽下武德中以縣置松州

餘與舊唐同者不錄

資治通鑑貞觀元年分天下爲十道

通鑑綱目開元二十一年分天下爲十五道

案右二條均本舊唐書地理志

唐書方鎮表乾元元年置浙江西道節度使

案唐書度字下尙有并江甯軍四字此奪

又未幾罷領宣歙饒三州兼餘杭軍使治杭州

案唐書三州下有副使二字此奪

又乾元二年廢浙江西道節度使置觀察使

案唐書觀察下有處置都團練守捉及本道營田十二字此

奪

又大歷十四年合浙江東西道置觀察使

案唐書置字下有都團練三字下貞元三年條元和二年條

大中十三年條觀察使上均有都團練三字均奪

又元和六年浙西觀察罷領鎮軍使

案唐書此下有太和九年復置鎮海軍節度使數日廢既而復置踰月又廢二十三字

又景福二年徙鎮海軍節度使杭州

案唐書使字下有治字此奪

又大歷五年廢浙江東道節度置觀察使

案唐書作置都團練守捉及觀察處置等使領州如故

唐書地理志睦州縣六建德清溪

案唐書作青溪此悞

文獻通考吳越王錢元瓘奏以蘇州之嘉興海鹽華亭置秀州案至元嘉禾志晉天福四年錢元瓘病支郡多闕而右藩強大始更邑爲州遂奏以嘉興爲秀州絕其海鹽華亭二地同附於州乃以境西義和聚爲崇德云云所紀比通志爲詳宋史地理志慶元府本明州紹興元年以寧宗潛邸陞爲府案紹興宋志作紹熙此誤

宋史地理志兩浙路州十二杭越湖婺溫台處衢嚴秀